

Date – 08/04/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Mizoram sawrkar leh Hmar People’s Convention (Democratic) te chuan April ni 14 hian Sakawrdai ah inremna an ziaik dawn.
2. Aizawl Municipal Corporation (AMC) inthlanpui April ni 21-a neih turah Party hrang hrang ngawrh takin an Campaign.
3. Kumina Akashvani kum 90-na champhaphak lawm turin Akashvani Aizawl chu ngawrh takin a inbuatsaih mek.
4. US leh Iran chuan kar hnih chung inkahhai puan a Strait of Hormuz-a him taka lawng kal tlang tir an remti.



HPC(D)

Mizoram sawrkar leh Hmar People’s Convention (Democratic) te chuan April ni 14 hian Sakawrdai ah inremna an ziaik dawn.

Home Department hnen atanga thudawn danin Mizoram sawrkar leh Lalthmingthanga Sanate kaihhruai pawl Hmar People’s Convention (Democratic) te chuan April ni 14 hian Sakawrdai ah inremna an ziaik dawn a, he inremna ziah hunah hian Adviser to Chief Minister (political) Pu Lalmuanpuia Punte pawh a tel dawn a, Sawrkar hotute sawi danin Inremna hi Mizoram sawrkar aiawhin Home Secretary in a ziaik ang a, HPC (D) aiawhin President Lalthmingthanga Sanate in a ziaik dawn a ni.

Sawrkar hotute sawi danin Hmar People’s Convention (Democratic) mi 43 te chu April thla chhunga an lo kir theih na turin ruahmanna siam a ni a, heng mi 43 te hian thuneitute hma ah an ralthuam an tun hunah an lo lut dawn a ni.

Mizoram sawrkar leh HPC(D) inremna tura inbiakna hi tunhnaiah khan neih a ni a, hetah hian Adviser to CM Pu Lalmuanpuia Punte leh Mizoram sawrkar bakah HPC(D) te inbia in April ni 14 ah inremna ziah an remti ta a ni.

Thudawn danin inremna ah hian HPC (D) hian a hranpa a phut an neilo a, amaherawhchu Sinlung Hills Council huamchhunga khaw hrang hrang inkalpawhna tha zawk neih an duh thu an sawi a, heng bakah hian HPC (D) mi leh sa te intun tunna tur sumfai pe tura inrem niin Sawrkar laipua Ministry of Home Affairs nen ngaihtuah tlan tura ruahman a ni.



HLAKUNGPI MUAL

Mizo Hlakungpui Mual thawh 6-na chu vawiin hian Khawbung ah hman a ni dawn a, Hla Kungpui Mualah hian Mizo thu ziak mi 4 leh hla phuah thiam mi 2 sengluh belh an ni dawn.

Vawiina hun hmanah hian Mizo Hlakungpui Committee, Govt Aizawl North College leh Govt J Thankima College te huaihawtin International Seminar buatsaih a ni ang a, April Ni 9 ah Sengluh thar 6 te chawimawina lung hawn a ni dawn bawk a ni.

Champhai District chhung Khawbung khuaa Hla Kungpui Mual hi kum 1986 khan Mizo hlahphuah thiam Patea leh Damhauva te hriatrengna lung phun a bultan niin, kum 10 dan zelah thu leh hla lama thawhhlawk boral tawh zinga thlan chhuah bikte chu a ni bi kima an thih ni atanga kum 5 tling chinte sengluh thin an ni.

Tunah hian Hla Kungpui Mualah hian thu ziak mi 15 leh hla phuah thiam mi 21 hriatrengna lung phun a ni tawh a; kumin April ni 8 leh ni 9 khian Mizo zinga thu ziak mi pali - Capt. LZ Sailo, Rev. Zairema, Khawlungi leh Lalhmingliana Saiawi bakah hla phuah thiam pahnih - Hrawva leh Lalmama te chu Hla Kungpui Mualah hian sengluh an ni dawn.

Hla Kungpui Mual hi puitling tan luh man Rs. 20 a ni a; kum kalta 2025 chhung khan Hla Kungpui Mual hian tlawhtu mi 6,915 neiin, an zinga mi 11 hi ramdang mi (foreigner) an ni a, India ram state dang mi 16 an awm bawk.



CAMPAIGN TRAILS

Aizawl Municipal Corporation (AMC) inthlanpui atana vote thlak ni tura ruat April ni 21, 2026 atanga chhiar letin ni 12 ala awm a, inthlan neih tur kaihnhawihah inthlan inkaihhruaina Model Code of Conduct (MCC) bawhchhiaa inpuhna complaint lut ala awm lo. AMC inthlanpui tur atan hian political party-te ngawrh takin an campaign mek a ni.

State Election Commission (SEC) hotute leh MCC Nodal Officer-te chuan Akashvani News Aizawl zawhna chhangin, AMC inthlanpui neih tura political party hrang hrangte inbuatsaih mek karah MCC bawhchhiatna kaihnhawih complaint an la dawn loh thu an sawi a; MCC bawhchhiatna a awm loh nan dan hnuaiah fel leh thianghlim taka campaign zel turin political party-te an duh thu an sawi.

Puan tawh angin AMC Inthlanpui neih turah hian political party pathum - Indian National Congress (INC) Mizo National Front (MNF) leh Zoram Peoples Movement (ZPM) ten ward tin chuh turin candidate 19 theuh an nei a, Bharatiya Janata Party (BJP) pawhin ward 11 chuh turin candidate an nei bawk.

Vote thlak ni tur atan April ni 21, 2026 ruat a ni a, zing dar 7 atanga tlai dar 5 thleng vote thlak hun hawn a ni ang. Inthlan result hi April ni 27 zing dar 8 atangin chhiar tur a ni.

AMC inthlanpui hi tum 3 neih a ni tawh a, inthlanpui hmasa ber kha November ni 3, 2010-ah neih niin MNF party-in seat 6, ZNP leh INC-in seat 5 ve ve leh MPC-in seat 3 an la a; inthlanpui vawi 2-na hi November ni 26, 2015-ah neih niin MNF-in seat 11, INC-in seat 7 leh MPC-in seat 1 an la a ni.



OIL & GAS

Mizoram Sorkar chuan, indona thleng mek vanga eirawngbawlna Gas leh tuialhthei-a harsatna thleng thei lakah Mizoram Sorkar chuan ngawrh takin hma a la reng a. Tun dinhmunah eirawngbawlna Gas leh tuialhthei chu Mizoramah a thleng tha a, mipui tan chia-na tur a awm lo tih an sawi.

Sawrkhar tarlan danin nimin April ni 7 thleng khan Mizorama LPG Distributor hrang hrangah Domestic (14.2Kg) bur 13,801 a awm a, kawng laka thang mek bur 25608 nen a vaiin bur 39409 awm ang a ni a. Commercial (19Kg) chu Distributor-ten bur 512 an kawl bakah kawng laka thang mek nen avaiin bur 312 a awm a. Petrol pawl Filling Station-ah Kilolitre 1289.80 awmin, kawng laka thang mek Kilolitre 373 nen a vaiin Kilolitre 1662.80 awm ang a ni a. Diesel chu Filling Station-a Kilolitre 1492 awmsa bakah kawng laka thang mek Kilolitre 435 nen a vaiin Kilolitre 1927 awm ang a ni.



RD&A MINISTER

RD&A Minister Prof. Lalnilawma'n nimin khan Champhai District Aerospots Association Paragliding Take-off site, Eco Cultural Park, Tlangsam khaw hluiah a hawng.

Prof. Lalnilawma chuan Paragliding Site buatsaih kawngah inlungual taka hnathawh ani chu lawmawm a tih thu a sawi a, hun kal zel turah pawh theihtawp chhuahpui zel a inhuam thu a sawi. Champhai District Aerospots Association hruaitute inpekna leh thawhrinnaah lawmthu a sawi bawk.

Minister chuan paragliding chu infiamna atan chauh ni lovin mahni invawna atan leh hriselna atan pawh a tangkai hle a ti a, a hmun chu khualzinte hipna hmun pawimawh tak ni chho zel tura hma a la turin sawrkharin theihtawp a chhuah tur thu a sawi a ni.



AKASHVANI 90 YEARS

Akashvani chuan kuminah kum 90 a tling dawn a, Akashvani kum 90-na champhaphak lawm tur hian Akashvani Aizawl chu ngawrh takin a inbuatsaih mek.

Akashvani Aizawl Director leh Mizoram Cluster Head Pu DR Lalropuia kaihhruaiin nimin khan Akashvani Aizawl hotute an thukhawm a, Akashvani kum 90 tlin lawmna tur hrang hrang rel niin ropui taka lawm tum a ni a, Akashvani bultan ni June ni 8 ah programme buatsaih tum niin hemi hma hian kum 90 tlin puala hun hrang hrang buatsaih tum a ni bawk.

Director Pu DR Lalropuia sawi danin Akashvani kum 90 tlin pual hian ramchhunga hmun hrang hranga lawmna hun buatsaih ani dawn a ti a, Mizoramah pawh ropui taka lawm tum ani tiin inbuatsaihna chak taka kalpui chhoh mek ani tih a sawi bawk.

Akashvani kum 90 tlin rual hian Akashvani Aizawl pawhin kum 60 a tling a, heng ni pawimawh pual hian Akashvani Aizawl chuan state chhungah lawmna hrang hrang buatsaih a tum a ni.

<><><>

SIAHA DEF

Nimin khan Siaha DEF ten ND&PS Act hnuaiia ruihhlo an man Heroin, Opium leh Ganja te case 8 an chinfel tawh te halralna Siaha Police Station Building chungah neih a ni.

Ruihhlo halral hi Heroin gram 65, Ganja kg 2.30 leh Opium gram 487te a ni a, a hlutzawng hi ₹ 16,58,526/- niin kum 2022 atanga kum 2025 chhunga ND&PS Act case hnuaiia case ziahluh te an ni a, District Drugs Disposal Committee ah hian SP chu Chairman niin, SDO (Sadar), Asst. Commissioner - Excise leh SDPO te chu member an ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

KOLASIB DC & MJA

Kolasib DC thar Pu H. Dolianbuaia leh Kolasib District MJA nimina inkawm chuan Kolasib hmasawmna tur hrang hrang an sawiho.

Kolasib DC Pu H. Dolianbuaia chuan hmasawna hnathawh kawng hrang hrang ah MJA te thawhpuina a mamawh thu a sawi a, an ngaih pawimawh zawng te inhrilh hre tawna hmalakna kawng hrang hrangah thawhho pui atan a sawm a. MJA te bak ah hian tlawmngai pawl hrang hrang leh VC te nen pawh thawhho na tha neih a pawimawh thu a sawi.

<><><>

MANIPUR

Manipur-a Bishnupur district-a Tronglaobi-a bomb puakah naupang pahnih an thih avangin state chhung hmun hrang hrangah lungawilohna lantir a ni. Thudawn danin district hmun hrang hrangah lungawilohna lantir niin kawngpui dan a ni a. Lungawilohna boruak inmung chho zel avang hian March ni 3 atang khan district panga-Imphal West, Imphal East, Thoubal, Kakching leh Bishnupur-ah te tiamchin awmlon Curfew puan a ni.

<><><>

US-IRAN

US leh Iran chuan kar hnih chhung inkahhai puan a Strait of Hormuz-a him taka lawng kal tlang tir an remti. US President Donald Trump-a chuan Strait of Hormuz-a him taka lawng a kal theih chuan kar hnih chhung US leh Iran inkahhai hi a pawm thu a sawi a. Social Media lamah he thu hi sawiin lehlam ve ve ten inkahhai hi an remtih a tul thu sawiin US chuan a thil tum a tihlawhtling tawh a, inepna boruak pawh chinfel a ni thei ang a ti bawk.

Hetihlai hian Iran Foreign Minister Abbas Araghchi chuan Iran beih chhonzawm anih tawh loh chuan Iran chuan inkahhai a remti a ti a. Kar hnih chhung inkahhai puan anih chuan Strait of Hormuz tluang takin a paltlang theih tawh dawn a ti a.

<><><>